

Kuala Lumpur: Pasukan KL Strike Force sudah melaksanakan lebih 1,100 tindakan penguatkuasaan sejak penubuhannya pada Mei lalu.

Menteri di Jabatan Perdana Menteri (Wilayah Persekutuan) Dr Zaliha Mustafa berkata, tindakan penguatkuasaan mendapat kerjasama pelbagai agensi termasuk Jabatan Imigresen Malaysia (JIM), Polis Diraja Malaysia (PDRM), Jabatan Kastam Diraja Malaysia (JKDM), Kementerian Kesihatan (KKM), Majlis Keselamatan Negara (MKN), Jabatan Kebajikan Masyara-

KL Strike Force laksana lebih 1,100 tindakan penguatkuasaan

kat (JKM), Kementerian Perdagangan Dalam Negeri dan Kos Sara Hidup (KPDN) dan Agensi Antidadah Kebangsaan (AADK).

Menurutnya, ia juga membabitkan lebih 2,200 tangkapan dilakukan dalam tindakan penguatkuasaan itu.

Katanya, tanggungjawab menjadikan ibu negara sebagai sebuah bandar yang selamat adalah menjadi keutamaannya.

“Sebab itu, dalam Parlimen baru-baru ini saya sebut ‘jangan macam-macam di Kuala Lumpur’.

“Aktiviti seperti persundalan, perniagaan tanpa permit, struktur haram tidak sepatutnya ada dan ia tidak boleh mendapat tempat di sini,” katanya ketika berucap di majlis setahun bersama pentadbirannya di Auditorium Dewan Bandaraya Kuala Lumpur (DBKL) di sini, se-

malam.

Dalam memperkasakan lagi tindakan penguatkuasaan, Dr Zaliha meminta supaya DBKL dan semua agensi KL Strike Force untuk bertindak lebih proaktif berbanding bersifat responsif atau reaktif hanya kepada aduan semata-mata.

“Tempat yang sudah diambil tindakan perlu diberi nafas baru atau dihidupkan semula dengan

kadar yang segera.

“Jika tiada perancangan, boleh pertimbangkan untuk menjadikan kawasan itu sebagai kawasan hijau atau kawasan lapang,” katanya.

Dalam pada itu, Dr Zaliha berkata, sebanyak 14 projek pemantauan dan penyelenggaraan *hotspot* dan cerun dilaksanakan sepanjang tahun ini.

Beliau berkata, potensi untuk meneroka konsep inovatif seperti *Sponge City* atau *on-site stormwater detention* (OSD) atau kolam takungan bawah tanah bagi memastikan ban-

dar raya ini terus mampan dan tidak lagi dibelenggu dengan isu banjir kilat.

“Isu banjir kilat juga sentiasa menjadi bualan rakyat di sini. Namun begitu, saya perlu beri pujian juga kepada DBKL dan pasukan yang bertindak segera apabila berlakunya banjir kilat pada 15 Oktober baru-baru ini.

“Saya faham, ada perkara yang di luar kawalan kita seperti perubahan iklim tetapi saya berpandangan perlu untuk kita meneroka usaha ini (konsep inovatif seperti *Sponge City* atau OSD),” katanya.